

## EPISTOLA R. MONACHI AD B. ABBATEM SUUM.

B. (f) Suo reverentissimo domino summæque A  
 laudis dignissimo monasterii Massiliensis divinæ  
 largitatis magnificentia dispensatori quam optimo, R.  
 ejusdem servus omnium licet sibi famulantium hu-  
 millimus, non in dilectione tamen minimus, debitæ  
 servitutis obsequium.

Evangelista testante, siquet ab angelis fuisse de-  
 claratum quod *in terra pax hominibus bonæ volun-  
 tatis*. Et alibi scriptum est: *Sufficit bona voluntas*.  
 Jure igitur, sicut voluntas aliquod perficiendi bonum,  
 etsi proficere nequeat, sufficiens esse perhibeatur,  
 eadem quoque mihi quam erga vos semper habui,  
 sufficere procul dubio credatur. Nam postquam vestræ  
 magnitudinis fama, quæ jam diu meis intonuerant  
 auribus, corporeis oculis videre promerui, vestræ  
 dilectionis immensitati, prout multis scire licuit,  
 meæ parvilitatis ingenium inseparabiliter adhibere  
 studui, sed ut probatio dilectionis quæ infra pectoris  
 septa æstuando latitabat, operis exhibitione quan-  
 doque redoleret, admodum optare solebam. Nec ideo  
 quia Deus plebem suam visitavit, quoniam vos ad  
 optimam, quam elegit sibi Maria, partem sublima-  
 vit, et monasterium Massiliense jam rectoris indi-  
 gentia penitus offuscatum vestrarum illustratione  
 virtutum mirifice decoravit. Quantum constat me  
 gaudere, si omnes artus in linguas verterentur, im-  
 possibile est cuiquam explicare.

Si autem vestræ solitæ bonitati placeat, attende :  
 ubi vos ad prædictum, Deo ducente, gradum prove-  
 cium fuisse comperi, uti vestris obtemperarem jus-  
 sibus, cur venire distuli, causam tamen etsi non  
 sufficientem reddere sum paratus. Noscat itaque  
 vestra, desiderantissime Pater, clementia, me quon-  
 dam prædicti cœnobii fratrum accepta licentia, pro  
 quodam nobis imminenti et intolerabili negotio satis,  
 ut credo, jam vobis notificato, Romam ire cœpisse,  
 ac usque Papiam sine collega proprio nimia pauper-

tate dimisisse, Romam cum extraneis profectum  
 fuisse; sed quia divinæ voluntati me cœptum iter  
 complere non libuit, animal cujus vehiculo Romam  
 usque tendere satagebam, in itinere prius infirmatum  
 prorsus ibidem mihi defuit. Quapropter ulterius  
 incedere quia non valerem, infectoque negotio statim  
 redire vehementer erubescerem, prius quidem titu-  
 bare cœpi, postremo tamen litterarum studiis operam  
 dare disposui, ibique paucis Dei gratia interpositis  
 moris, hactenus animum exercendo moratus fui. Hæc  
 est igitur causa, dulcissime domine, cur postquam  
 illud quod anima mea diu optaverat, evenisse con-  
 cepti, ad vos festinare distuli. Imo magis ac magis,  
 ut melius vobis amodo vita comite deservire valeam,  
 studere proposui. Nunc autem quia per totam fere  
 B Italiam scholares et maxime Provinciales, nec non  
 ipsius ordinis de quo sum, quia plures legibus cater-  
 vatim studium adhibentes incessanter conspicio, et  
 monasterium nostrum a clericis et a laicis sine inter-  
 missione placitando lacessiri, atque justarum pos-  
 sessionum detrimentum pati considero, aliquantula  
 hujusmodi scientiam habere desidero. Nam si  
 quid in hoc opere, divina largiente gratia, prævale-  
 rem, nec sæcularibus placitis inhiarem, sed solam  
 nostri monasterii justitiam, quantum possem, adju-  
 varem. Si vestræ igitur, summe Pater, dignitati pla-  
 ceat ut in hoc opere studium pro posse meo exer-  
 ceam, quæso et suppliciter obsecro, quatenus super  
 hoc negotio C charitativam mihi licentiam impendatis,  
 et Pisano priori vestris litteris, ut mihi subveniat,  
 mandare disponatis. Si enim quod exspecto apud  
 vestram misericordiam impetravero, Pisas ad exer-  
 cendum ibi studium, si Deus concesserit, adiero.  
 Interim autem usque ad festivitatem sancti Mi-  
 chaelis vestræ consolationis præceptum exspectavero.  
 Valete.

(1) Forte Bernardo, qui ab anno 1065 ad 1079 Massiliense S. Victoris monasterium rexit.

## ALWALO

## EPISTOLA ALWALONIS AD L. PONTIFICUM

(MARTEN., *Theas. Anecd.* I, 105.)

Hanc et sequentem epistolam eruimus ex veteri codice ms. oratorii Trecensis, cujus character annos 600  
 superare videtur. Quisnam fuerit primæ auctor Alwalo et L. summus pontifex ad quem scribit, necdum  
 divinare potui. Si conjecturis aliquid tribuere liceat, L. non Romanus pontifex, sed simplex episcopus fuit.  
 Certe in sequenti epistola nudum episcopi titulum accipit. Nec vacat exemplis quibus simplices episcopi  
 appellantur summi pontifices. Ita Bruno Coloniensis archiepiscopus *summus pontifex appellatur* a Widrico  
 in Vita S. Gerardi Tullensis episcopi. Heldricus vero abbas, ad quem iste scribit, is esse videtur Hel. con-  
 gregationis monasticæ Pater, ad quem exstat epistolæ Brunonis episcopi fragmentum, qui Bruno anno 980  
 Lingonicæ sedis thronum ascendit, Hildricus scilicet Antissiodorensis, S. Germani abbas, qui anno 990  
 præerat.

## I.

EPISTOLA ALWALONIS AD L. PONTIFICEM.

*Petit absolvi ab excommunicatione inflicta ob illatas præposituræ Capuleiensi injurias.*

ALWALO, miserrimus plus cæteris mortalibus, peccatorum onere pressus, L. summo pontifici, nostris temporibus unico pene Dominicæ vineæ procuratori, quidquid patri filius domino servus.

Dominicæ animadversiois, propriis exigentibus peccatis, ultione percussus, mortis timore territus, animæ tantum salutis cupidus, ad vos seu ad unicum animarum medicum confugio, et quæ meis ulceribus adhibenda sint medicamina salubriter intimari exposco. Nostis namque ipse quanto excommunicationis astrictus teneor anathemate ob Capuleiæ præposituram S. Martini scilicet potestatem. Unde si mihi vitæ protelati fuerint dies, canonicorum ipsius sancti me decrevi examen expetiturum, et juxta consilii vestri decretum in omnibus me spondeo acturum. Cæterum si spe vitæ frustratus exstitero, uxori et natis meis sub Christi testimonio in eorum fide hæc agenda committo; eo tamen tenore, ut obsequia quæ Christianis exhibenda sunt morientibus, mihi abnegare non permittatis.

## II.

EPISTOLA L. EPISCOPI AD HELDRICUM ABBATEM.

*S'gnificat qua ratione Alwalonem absolverit ab excommunicatione.*

Dilectione Christi ferventi abbati HELDRICO omni-

A que ejus congregationi episcopus peccator L. salutem et sanitatem.

Gratias reddō vobis, fratres charissimi, quod sanctæ auctoritatis amore ferventes, a communione sanctæ Ecclesiæ privatum Alwalonem suscipere nolulistis in sepulturam: sed hunc quo tenore absolverim notum faciam vobis. Misit namque ad gratiam nostræ majestatis uxor cum filiis duos viris ferentes litteras promittentes omnem emendationem, et petentes fieri absolutionem. Quorum ego veris non credens, nolui assentiri, donec ipsi sacramento juraverunt quod uxor cum filiis usque in festivitatem S. Martini, ipsi beato Martino ejusque canonicis recta fide emendarent quidquid principum censura judicaret eos debere emendare, et secundum morem legis persolverent: quod si facere noluerint, isti de viri qui petitores sunt absolutionis, in obsidione canonicorum et in potestate se tradent die festivitatis S. Andreæ. Hoc ergo tenore absolvimus Alwalonem auctoritate Patris, et Filii, et Spiritus sancti, et sancti Martini, omniumque sanctorum et nostra, et damus vobis licentiam in sepultura recipiendi. Vobis autem mandamus ut et vos eum absolvatis, sicque Deus benedicat vobis. Uxorem vero et filios sciatu esse absolutos, donec emendatio sit facta et persoluta, et sine ejus præsentia et filiorum jubemus eum in terra, ut per hoc sciant se excommunicatos.

# ANSELLUS SCHOLASTICUS

## NOTITIA

(MANSI, apud Fabric. *Biblioth. med. et inf. lat.*, t. I, p. 411.)

Hunc Ansellum credo monachum. Hujus est opusculum in cod. 57 S. Illidii Claromontensis, apud P. Montfaucon, *Bibl. mss.*, pag. 1263. Est vero operis titulus: *Visio cujusdam monachi in monasterio S. Remigii, descripta ab Anselmo, discipulo S. Abbonis, abbatis Floriacensis, jussu Oddonis abbatis.*

## VISIO ANSELLI SCHOLASTICI.

(Edidit D. Edelestand du MÉNIL, *Poésies latines populaires*, t. I, p. 200.)

In Salomonis ferculo,  
Quod construxit de Libano  
Ex lignis mirabilibus,  
Mystica signans altius,  
Ubi reclinatorium  
Ex auro struxit optimum  
Ascensuque purpureum,  
Ob Hierusalem filia,  
Quæ designant Ecclesiam,

Spiritale convivium  
Reperias quam plurimum.  
Ibi cum pleno copia  
Cornu infert cibaria  
Ut nostras querelas levet,  
Diversis cibus satiet,  
Quo cesset humanum genus  
Flere miseros exitus.  
Sed carpens poma dulcia

Et convallium lilia  
Inter flores dulcissimos  
Ac mellis gustus aspidos,  
Unum quiddam reperies  
Quod gustabis suaviter.

Est civitas metropolis,  
Remis dicta pernobilis,  
Quam Remus quiddam condidit